

INTERDISCIPLINARNI PROJEKAT

“MOJ POSAO IZ SNOVA”

Dragi učenici/e,

Ovaj projektni zadatak radite **individualno**, a **rok za predaju je 15 dana od danas**. S obzirom da smo u ovom projektnom zadatku objedinili Marketing, Bosanski jezik i Matematiku, predmetne profesorice i ja smo se dogovorile da ćemo vas sve tri ocijeniti iz ovog rada. Dakle, dobit ćete ocjenu iz marketinga, bosanskog i matematike. Ocjena će biti ista iz sva tri predmeta (aritmetička sredina ocjena koje budemo dale nas tri). Jedino u slučaju da iz nekog dijela npr. matematike dobijete jedinicu, onda iz matematike, bez obzira na aritmetičku sredinu tri ocjene, ne možete dobiti više od dovoljan (2). Naravno, svi se iskreno nadamo da takvih slučajeva neće biti.

Koncept rada

Rad može sadržavati najviše 12 stranica. Radite fontom Times New Roman, veličine 12, uz obostrano poravnanje. Za sve podatke koje koristite u fusnoti napišite izvor (web stranicu, knjigu, članak).

1. Razmisli o svom poslu iz snova. i napiši sastav na temu: “Moj posao iz snova”.

Sastav pišite kao da o svom poslu iz snova pričate svom najboljem drugu/drugarici. U pisanju sastava obratiti pažnju na način pripovijedanja. S obzirom da je pričate iz svog ugla onda koristite ich formu / pisanje u prvom licu /. To povlači za sobom unošenje emocija ali i pozornost da ne izgubite nit i predjete na opći plan. Osnovni dijelovi rada / uvod, razrada i zaključak / moraju obavezno biti zastupljeni. Ako se odlučite koristiti upravni govor onda to radite kako to pravila nalažu a ne kako se vama čini da je ispravno. Ako ne znate, radije izbjegavajte nego da griješite.

2. Istraži na internetu o kompaniji u kojoj bi želio/željela raditi svoj posao iz snova.

Detaljno istraži bavi li se kompanija proizvodnjom, prodajom, uslugama; koje distributivne kanale koristi, koji su im najpoznatiji proizvodi/usluge; koja im je ciljna skupina potrošača, koje tržište obuhvata, ...

3. Osmisli i kreiraj motivacioni slogan i logo kompanije koju si predstavio/predstavila u 2. dijelu.

U logu se mora pojaviti bar jedna od četiri krive drugog reda. Također, logo mora sadržavati sve one odrednice loga koje ste učili iz marketinga.

Za kreiranje loga koristite neki od sljedećih web alata: paint, www.wordart.com, www.canva.com, www.postermywall.com.

4. Kreiraj tekst oglasa za svoj posao iz snova koji daje kompanija koju si predstavio/predstavila u 2. dijelu.

Kako bi uočili razlike u kreiranju oglasa zavisno od medija i publike kojoj su namijenjeni, taj isti oglas kreirajte:

a) za dnevni list (novine) (u wordu),

b) u obliku plakata koji će biti izvješten u vašem omiljenom kafiću (pomoću alata: www.canva.com, www.postermywall.com),

c) za objavljivanje na televiziji, u obliku "Breaking news" (pomoću alata: www.breakyourownnews.com).

5. Motivaciono pismo i CV

Napiši svoj CV u europassu, koji ćeš priložiti uz motivaciono pismo u sklopu prijave na konkurs (koji je kreiran u 4. dijelu).

U pisanju motivacionog pisma pažljivo birajte izraze i koristite isključivo književni funkcionalni stil sa primjesama administrativno- pravnog tamo gdje je neophodno. U pisanju motivacionog pisma izbjegavajte unošenje emocija. Ne zaboravite da persirate osobu kojoj se obraćate.

U prilogu se nalazi prezentacija o pisanju CV i motivacionog pisma, pa je iskoristite prilikom realizovanja ovog zadatka.

6. Rođendanski matematički zadatak

Brojkama iz datuma svog rođenja odredite kružnicu tako da je: O(dan vašeg rođenja, mjesec vašeg rođenja), r= godina vašeg rođenja. Na ovako određenu kružnicu položiti tangente paralelne sa pravom:

(dan rođenja mame)x+(mjesec rođenja mame)y = godina rođenja mame

Napisati jednačine kružnice i prave vezanih uz datume rođenja, konstruisati datu kružnicu, odrediti jednačine tangenti, konstruisati te tangente, sve postupno uraditi u Equation Editoru i nacrtati u sveskama, a crtež zadatka nacrtati i u geogebri.

Npr. ako je učenik rođen 06. januara, 2004. godine, kružnica će imati centar u tački O(6, 1), a poluprečnik iznosi 4.

Ako je majka učenika rođena 23. jula, 1976. godine, prava sa kojom će tražene tangente biti paralelne je:

$$23x+7y=76$$

7. Kviz o krivima II reda

Uraditi kviz o krivima II reda. Kviz možete uraditi u nekom od alata: gForms, kahoot, www.opinionstage.com, www.mentimeter.com ili u nekom drugom.

8. Zaključak (Refleksija na urađeno)

Najvažniji dio bilo kojeg projekta je promišljanje o urađenom, po završetku svega. To je vrijeme za učenje iz grešaka, iz onog što je bilo uspješno,... U ovom dijelu osvrnite se na vaš rad, razmislite čime ste zadovoljni, a čime ne, šta vam se dopalo, a šta ne, te zaključite šta ste iz rada u ovom projektu naučili.

Kriteriji ocjenjivanja

		Odlično	Vrlo dobro	Dobro	Dovoljno	Nedovoljno	Ocjena
Profesorica Marketinga	Istraživanje o kompaniji	Zadatak u potpunosti tačno urađen	Zadatak tačno urađen sa 2-3 sitna nedostatka	Zadatak tačno urađen sa 4-5 sitnih nedostataka	Zadatak tačno urađen sa više od 5 sitnih nedostataka	Uopšte nije urađen zadatak.	
	Logo kompanije	Zadatak u potpunosti tačno urađen	Svi elementi su organizirani relativno jasno. Dobar odabir boja slova i pozadine. Tekst je sažet u ključne riječi ili rečenice i vidljiv, dobra veličina fonta	Veličina slova je uglavnom svima vidljiva. Logo sadrži previše teksta.	Veličina slova nije dovoljno velika da bude vidljiva svima, nedostaju grafički prilozi, podloga nije dobro odabrana	Uopšte nije urađen zadatak.	

	Oglas za posao	Zadatak u potpunosti tačno urađen	Zadatak tačno urađen sa 2-3 sitna nedostatka	Zadatak tačno urađen sa 4-5 sitnih nedostataka	Zadatak tačno urađen sa više od 5 sitnih nedostataka	Uopšte nije urađen zadatak.	
Profesorica Bosanskog jezika	Opis posla prijatelju					Uopšte nije urađen zadatak.	
	Motivaciono pismo					Uopšte nije urađen zadatak.	
	Oglas za posao					Uopšte nije urađen zadatak.	
Lejla Hujdur, prof. Matematike	Rođendanski zadatak	Zadatak u potpunosti tačno urađen, i to na dva načina: u geogebri i na klasični način.	Zadatak tačno urađen ali na samo jedan način.	Zadatak urađen uz manje greške.	Zadatak pogrešno urađen.	Uopšte nije urađen zadatak.	
	Kviz o krivima II reda	U kvizu zastupljena i teorija i zadaci. Kviz osmišljen i realizovan	U kvizu je zastupljena i teorija i zadaci, ali ima par grešaka.	U kvizu su zastupljeni samo zadaci.	U kvizu je zastupljena samo teorija.	Uopšte nije urađen zadatak.	

		vrlo kreativno, bez ikakvih grešaka!					
Svi	Primjena web alata	Svi zadaci vezani za web alate urađeni jako kreativno.	Svi zadaci vezani za web alate urađeni korektno, bez posebne kreativnosti .	Neki zadaci nisu rađeni pomoću web alata.	Uopšte nisu primjenjivi ni web alati.	-	
	Tehnički izgled rada	Svi dijelovi jasno odvojeni u strukturi rada. Obostrano poravnanje , ujednačen font, jezik i stil pisanja.	Neki dijelovi rada nisu jasno odvojeni.	Miješaju se ekavica i ijekavica, miješaju se različiti stilovi pisanja.	-	-	
	Zaključak	Vrlo kreativno urađen zaključak.	Zaključak napisan korektno, u skladu sa datim smjernicama.	Zaključak donekle urađen u skladu sa datim smjernicama.	Zaključak je urađen, ali ne poštujući date smjernice.	Zaključak uopšte nije urađen.	